



**PORTAVÓS**  
VI GOVERN U  
KONSTITUSIONÁL



**KOMUNIKADU  
BA MEDIA**

Díli, Loron 03 fulan-juñu tinan 2016

## **Konferénsia Internasionál kona-ba Investimentu fó hatene kona-ba oportunidade sira no knaar husi TradelInvest Timor-Leste**

Konferénsia Internasionál kona-ba Investimentu iha Timor-Leste hahú iha loron-domingu ne'e (loron 5 fulan-juñu) kalan, no kontinua fali iha loron-segunda no loron-terça, ho programa lubuk boot ida ne'ebé iha objetivu atu hatudu potenciál Timor-Leste nian iha área negósiu nian balu. Governu Timor-Leste no empreza Aaustrália nian, hanaran Informa, ne'ebé mak organiza konvensaun sira ne'e, hateten sira serbisu hamutuk ona hodi asegura representasaun nivel aas ida, no Ajénsia kona-ba Promosaun Investimentu no Esportasaun Governu nian - TradelInvest Timor-Leste fasilita partisipasaun empreza, ajénsia no investidór sira. Parseiru potenciál sira iha área negósiu nian maihusi mundu tomak atu participa iha Konferénsia privada ne'e, no tuir lista ne'ebé iha, persentajen boot liu husi delegadu sira ne'ebé participa, maihusi Austrália no nasaun sira ASEAN nian.

Ministru Planeamentu no Investimentu Estratéjiku, Kay Rala Xanana Gusmão, sei marka prezensa iha sesaun boazvindas nian, iha domingu kalan. Prevee ona katak Primeiru-Ministru, Rui Maria de Araújo, loke ofisiálmente konferénsia ne'e, iha segunda dadeer, tuku 9:00. Ministru Estadu, Coordenadór Asuntu Ekonómiku no Ministru Agrikultura no Peska, Estanislau da Silva, sei halo diskursu ikus nian, iha loron 7, iha parte loro-kraik.

Entre kolaboradór timoroan sira seluk, sira ne'ebé participa maka Diretór Ezekutivu TradelInvest, Arcanjo da Silva, Prezidente Timor GAP, Francisco Monteiro, Diretór sira husi Autoridade Nasionál Petróleu no Minerál (ANPM) no Prezidente Kámara Komérsiu Timor-Leste, Oscar Lima. Prezidente Zona Espesiál Ekonomia Sosiál Merkadu Oekusi nian, Mari Alkatiri, sei halo apresentasaun ida kona-ba projetu sira ne'ebé daudaun ne'e hala'o hela.

Entre vizitante sira, sira ne'ebé participa maka Vise-Ministru Governu Territóriu Norte Austrália nian, Peter Styles, Embaixadór Austrália nian iha Timor-Leste, Peter Doyle no emprezáriu no organizasaun oioin, inklui Banku ANZ, Banku Dezenvolvimentu Aziátiku, AICEP-Portugal, ANL Container Line, Konselu Empezariál Austrália/Timor-Leste nian, Grupu Bollere, Conoco Phillips, Ernst and Young Portugal, Korporasaun Finanseira Internasionál, SDV, USAID no organizasaun World Fish.

Iha konferénsia ne'e, sei fahé istória kona-ba investimentu sira ne'ebé estabeselese ona no hirak ne'ebé foin mosu, ho apresentasaun husi parte TL Cement, Heineken ÁZia-Pasífiku no Jape Group InternaCional.

Tema balun ne'ebé atu apresenta maka hanesan dezenvolvimentu husi esplorasaun mina-rai no potenciál explorasaun minerál iha Timor-Leste, perspetiva sira kona-ba investimentu no atividade ekonómika,



**Agio Pereira**

+670 7723 0011

[agio.pereira@cdm.gov.tl](mailto:agio.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)

partisipasaun iha merkadu sira ne'ebé foin mosu, konstrusaun infrastrutura ho kualidade no setór finanseiru no investimentu nian.

Organizadór, TradeInvest Timor-Leste, hein ho interese Konferénsia ne'e, ne'ebé ajénsia ne'e haree hanesan kontributu importante ida ba objetivu husi promosaun investimentu no ba esportasaun sira iha Timor-Leste. Ajénsia ne'e, harii servisu "one-stop" [sentralizasaun husi formalidade legál sira iha servisu ida de'it] atu investidór no esportadór lokál sira no rai-li'ur no ajénsia ne'e maka sai responsavel ba prosedimentu administrativu sira ne'ebé envolve atubele fó Sertifikadu Investimentu nian, Sertifikadu Esportadór nian sira no Akordu Espesiál Inventimentu nian sira. Governu Timor-Leste disponibiliza insentivu signifikativu ba investidór kualifikadu sira, ne'ebé liuhusi livre impostu no liuhusi direitu no garantia sira ne'ebé buka atu asegura ambiente ida ne'ebé di'ak ba investimentu.

Sei marka prezensa iha Konferénsia ne'e, meu komunikasaun internasionál oioin, ne'ebé maka sei halo kobertura kona-ba eventu ne'e no habelar informasaun sira kona-ba oportunidade investimentu nian sira iha Timor-Leste.

Portavós Governu Konstitusionál VI, Ministru Estadu Agio Pereira, hatete katak "investimentu internasionál no parseria negósiu sira fundamentál ba ekonomia ida ne'ebé diversifikada no sustentavel iha Timor-Leste. Governu, liuhusi ninia pakote reforma ekonómika no liuhusi ajénsia sira hanesan TradeInvest Timor-Leste, to'o oras ne'e hadi'a nafatin ambiente negósiu nian no hatudu nafatin oportunidade sira ne'ebé iha ba emperezáriu nasional no internasionál sira. Governu felisita empresa Informa Austrália no TradeInvest Timor-Leste nian ba esforsu hirak ne'ebé dezenvolve ona atu Konferénsia Internasionál Investimentu bele la'o".**REMATA**

